

بِسْمِ اللَّهِ الرَّحْمَنِ الرَّحِيمِ



Khutba Jummah

Hazrat Khalifatullah Muir. A. Azim (atba)

27 Mars 2020
02 Shabaan 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lors :

Bane Signes d'Allah (Pt.3)

Mo comprend ki même bane prophètes et les autres dimounes véridiques, zot fine bizin quelques fois faire face à bane difficultés (ki nous capave appelle bane calamités) mais c'est ene erreur grave et ene pêché pou penser ki saki arrive zot c'est à cause de bane péchés ki zot fine faire. Ena ene grand différence entre bane calamités ki tombe lors bane dimounes véridiques, bane dimounes chers à Allah et bane ki désobéir Li et bane ki commette péchés.

La patience ki fine donner à sa bane dimounes véridiques là faire de sa bane calamités et de sa bane difficultés là ene source de douceur. Zot réjouir de sa parski sa pousse zot vers bane progrès spirituels. Sa bane épreuves là dirige zot vers zot l'ascension spirituelle. Sa bane épreuves là vine couma ene l'échelle pou zot pou zot capave vine pli près avec Allah, pou zot degré spirituelle augmenter.

Celui ki pas passe par bane telles épreuves et difficultés pas pou capave jamais progresser ; d'autre part, bane calamités et bane épreuves ki le résultat de so bane propres mauvais actions, zot bane vrai calamités ki apporte ene sentiment de révolte ki rende la vie insupportable. Ene telle dimoune préfère la mort, au lieu

pou continuer vivre, mais bien sûr, li pas conné ki la mort pas pou mette ene fin à ene telle situation de calamité. Pour li, sa bane conditions là pou prévaloir dans l'autre monde aussi.

Bref, d'après la loi de la nature concernant sa bane calamités là, bane d'entre zot ki le résultat de so propre mauvais conduite, zot bien différents de bane calamités ki bane véridiques et bane prophètes bizin faire face; et ki en fait, zot destiné à accorde zot l'avancement spirituel.

Bane ignorants ki pas comprend le secret de sa phénomène là, au lieu ki zot tire profit de sa et pou apporte ene transformation dans zot la vie, zot commence associer bane telles épreuves à saki bane prophètes et messagers ena pou faire face, kan tandique pas ena aucaine comparaison entre les deux. Sa maladie ki appelle l'ignorance là li bien grave!

Celui ki affligé avec sa commence compare bane kitchoses incomparables. Comparer bane épreuves ki subir par bane prophètes à bane ki subir par bane dimounes ordinaires li nek ene grand déception. Zot bizin rappelle ki bane épreuves ki subir par bane prophètes et bane les autres élus d'Allah, zot nek ene marque d'amour de la part d'Allah, parski à travers sa bane épreuves là, Allah accorde zot bane plus hauts rangs dans le domaine spirituel.

Mais kan bane malfaiteurs zot affronté à bane telles épreuves, c'est dans l'intention pou détruire zot. Punition divine ena plusieurs traits caractéristiques ki aider pou différencier entre li (punition divine) et ene catastrophe naturelle.

(1) L'histoire de prophète Nuh (as) fourni ene l'exemple clair et édifiant lors sa sujet là. Li ti mette so peuple en garde contre calamité ki ti pou tombe lors zot si zot pas mette ene terme à zot bane mauvais agissements et si zot continuer persister pou rejette so bane revendications en tant ki Messenger d'Allah. En même temps, li ti averti so peuple ki zot pou alle noyer par ene extra grand déluge ki jamais auparavant le monde fine témoigner.

Après ki li fine donne so avertissement, Nuh (as) fine mette li au travail pou construire, sous l'ordre d'Allah, ene l'arche kot bane vrais croyants pou être à l'abri ; zot pou sains et saufs. Enfin, sa jour promis là fine arriver; d'après Quran Shareef: « **Alors, Nous fine ouvert bane la portes lé ciel, avec de l'eau en torrent.** » (Al-Qamar 54 : 12)

À quelques détails près, sa l'évènement là li reconnu par tous les trois grands religions du monde, c'est-à-dire, le Judaïsme, le Christianisme et l'Islam.

2) Le deuxième caractéristique d'ene punition divine c'est ki li soumette à ene certain condition ki pas la cause directe de sa calamité terrestre ou céleste ki pou manifester là.

Durant l'apostolat de Salih (as) (ki Allah ti envoyé à tribu de Thamud), fine ena ene explosion épouvantable. Pas ti ena aucaine relation entre explosion là et le fait ki bane malfaiteurs fine coupe jarrets d'ene chamelle.

3) Le troisième signe c'est ki kan ene punition divine manifester, bane croyants zot être sauvés et bane incroyants zot recevoir sa punition là. Le prophète de l'époque averti bien clairement ki bane ki vertueux (pieux) zot pas pou gagne aucaine malheur. Nous noté [trouver] ki le Quran Shareef faire mention de bane certains punitions, ki fine frappe bane incroyants ainsi ki bane croyants. Toutefois, sa bane punitions là ti bane exceptions à la règle et ti ena bane les autres buts.

4) Quatrième différence c'est ki après ene punition divine la philosophie et le mode de vie ki prédominer zot anéanti ou complètement effacé de la surface de la terre. Le nouvo idéologie sorti victorieux et bien vite li atteindre le sommet de la gloire.

5) Cinquième caractéristique ki différencier ene punition divine d'ene catastrophe de l'époque li mentionné dans sa verset Quran Shareef là: « **Pourtant Nous pas ti montrer zot aucaine signe ki pas ti plus grand ki so précédent. Nous fine alors maille zot avec Nous punition, afin ki zot retourne [vers Allah].** » (Al Zukhruf 43 : 49).

En d'autres mots, la sévérité de sa punition là augmenter progressivement et tanque ki le triomphe final pas vini, sa série de punitions là pas pou arrêter. Si nous faire ene courbe [lors ene graphe] pour suivre l'évolution de la sévérité de bane punitions divines, tout en excluant bane cas extrêmes, nous pou constater ki l'ampleur de bane calamités zot augmenter dans le temps. Si ene peuple rejette bane messages du prophète de l'époque et ki la destruction fine annoncé à l'avance, alors la punition divine finale pou survenir dans ene forme ki plus sévère et décisive. Ene telle sévérité pas exister avec bane catastrophes ordinaires.

6) Sixième différence c'est ki bane catastrophes ordinaires zot pas influencés par la condition du cœur de l'homme. Si bane sentiments de regrets et de remords manifester et si ena la volonté pou demande pardon, alors, la punition divine li écartée: « **Mais c'est pas possible ki Allah envoye lors zot So punition kan toi [le Prophète] to encore parmi zot, et Li pas pou puni zot kan zot capave encore demande pardon.** » (Al-Anfal 8 : 34)

Nous ena ene l'exemple frappant de sa principe là à l'époque du prophète Yunus (as) (Jonah).

7) Septième différence c'est ki sa punition [divine] là pas vini aussi longtemps ki le prophète choisi pas quitte sa place là. Par exemple, en adressant le Saint Prophète (saws), Allah dire: « **Mais c'est pas possible ki Allah envoye lors zot So punition kan toi [le Prophète] to encore parmi zot, et Li pas pou puni zot kan zot capave encore demande pardon.** » (Al-Anfal 8 : 34)

Bane punitions divines zot bane calamités ki apparaite ene fois ki bane vertueux fine quitte sa place là. Ena bane types de catastrophes kot aucaine moyen de survie pas capave être adopté. Malgré sa, bane vertueux zot pas puni. Bane prophètes zot averti de sa désastre à venir là et Allah ordonne zot pou prend certains mesures préventives. Bane adversaires, quant à zot, zot ena tous bane mesures disponibles à zot dispositions mais toutefois, zot trouve zot dans l'incapacité pou échappe à sa catastrophe là.

Le prophète et so bane compagnons zot protégés par la puissance divine. Sa puissance divine là vini avec ene telle la force miraculeux ki étonne bane ignorants et bane non-croyants. À l'époque de Musa (as) bane zenfants d'Israël [Bani Israël] ti recevoir l'ordre pou adopter ene seule mesure préventive, c.à.d., ene interdiction concernant dipain lélvain. De l'autre côté, le peuple de Pharaon ti ena la liberté totale pou prend tous bane précautions nécessaires afin pou prévenir [évite] ene l'épidémie. Certains maladies fine commence propager. Seul le peuple de Pharaon ti victimes de l'épidémie alors ki bane suivants de Musa (as) ti épargné.

A l'époque du Messie Promis (as), ti ena ene l'exemple semblable avec l'apparition de la peste.

Dans sa siècle présent là aussi, ena beaucoup bane catastrophes naturelle couma bane inondations, et bane cyclones/ tempêtes dans bane différents pays du monde. Ena bane tremblements de terre et glissements de terrain. Ena bane maladies couma Chikungunya, la vache folle, virus aviaire, bane virus H7N3H, H1N2 etc., ti ena SARS [ene virus ki attaque poumon bane dimounes] et maintenant ene nouveau virus (sans précédent) ki ene nouveau type de coronavirus, ki fine nommé COVID-19 ki fine appaite pour la première fois dans la Chine dans le mois de Décembre 2019. Tout comme COVID-19, SARS (ene virus sans précédent) ti appaite dans la Chine en l'an 2002-2003.

Jusqu'à azordi – et le nombre pé continuer augmenter même – nous témoin de 532,263 cas positifs de COVID-19, ki fine faire 24,090 morts. À Maurice, le nombre de cas positifs fine augmenté. Ena maintenant officiellement 81 cas positifs à Maurice, kot là-dans ena 2 morts.

Allah Le Tout Puissant fine annoncer, et sa depuis longtemps, l'approche de bane grands destructions couma bane tremblements de terre, inondations, glissements de terrain, bane virus mortels, bane accidents avion, bane cyclones, crimes, et bane la guerres kot beaucoup disang pou fanner, etc. Troisième guerre mondiale pas loin. Bane la guerres raciales pou touche tous les quatre coins du monde. Même l'île Maurice et les autres l'îles pas pou épargné. Bane pertes de vie pou telle ki disang pou couler à flo. Même bane zaimo et bane oiseaux pas pou épargné ; pou ena ene telle destruction ki pou appaite couma zamais pas fine paraite depuis la création de l'homme. La plupart de bane la caze pou renversé couma dire zamais zot ti habité. Bane les autres afflictions, de formes diverses pou fer zot l'apparition lors la terre couma dans lé ciel aussi, et bane dimounes pou reconnaite ki zot [sa bane catastrophes là zot] extraordinaires. Nous pas trouve aucaine mention de sa dans bane livres de philosophie ou d'astronomie.

L'humanité pou troublé profondément et pou demander saki pé arrive li. Beaucoup pou être sauvé, mais beaucoup aussi pou anéanti.

Bane jours proches voire même zot devant la porte kot le monde pou assister à bane scènes du Jour du Jugement, bane tremblements de terre mise à part, bane les autres afflictions [catastrophes] effrayants pou manifester, certains ki pou vine du ciel, et certains pou manifester lors la terre même.

Tout sa pou arriver parski l'homme fine arrête adore vrai Bondié [Allah]. Tout so l'attention au lieu de sa concentré lors le monde. Si mo pas ti vini, sa bane catastrophes là ti pou être retardé quelque peu, mais mo venue fine faire ki bane plans d'ene Bondié ki en colère fine vine clairs après ene longue période, pareil couma Li [Allah] fine dire : « **Nous envoye Nous punition seulement après ki Nous fine envoye ene messenger (pou averti dimounes).** » (Bani Isra'il 17 : 16)

Bane ki repentir pou être sauver ; et pou bane ki gagne la crainte d'Allah avant ki ene affliction atteindre zot, zot pou recevoir la miséricorde [divine].

Eski zot croire ki par zot bane propres moyens zot pou être à l'abri avec bane punitions divines ? Mo craindre ki bane calamités encore pli dure, encore pli grave ki sa fine réserver pou zot pli devant. Personne pas en sécurité, sauf celui ki vine de l'avant vers Allah L'Unique avec ene lé cœur rempli avec répentance.

Aucaine divinité de ou imagination pas pou capave aide ou. Mo trouve bane cités et bane habitations pé tombe en ruines. Le Dieu Unique fine reste tranquille pendant ene certains temps. Bane dimounes fine commette bane mauvais actions devant So lizié; et Li fine reste tranquille, mais maintenant Li pou montrer ene visage terrifiant. Ki celui ki ena bane oreilles tender ki sa le temps li pas loin. Mo fine essaye rassembler zot tous (le monde en entier) sous la protection d'Allah. Mais bane décrets d'Allah pou bizin exécuté sans aucune doute. Zot pou trouve bane jours de Nuh (as) – sa bane jours là fine déjà arrive à nous et sa c'est ene commencement ki zot pé trouver ; ena encore pli graves pou vini, et zot lizié pou témoigne bane moments vécus par bane pays de Lut (as). Mais Allah Li prend So létemps pou vine en colère ; Li donne ene certains létemps afin ki bane dimounes demande pardon. Alors demande pardon afin ki zot recevoir la miséricorde. Celui ki abandonne Allah li ene lé ver et non ene z'homme; et celui ki pas peur Li li ene cadavre, et non ene être vivant.

Mo termine mo Khutba ici et mo conseille zot pou tourne vers ene sel Allah, ene Allah Unique, puissant, et cherche So pardon et So l'aide Ô bane habitants de la terre et tous bane musulmans. Écoute-moi saki mo pé dire zot, mo fine vini pour guide zot lors le droit chemin, le chemin ki amène vers ene seul Dieu. *Insha-Allah.*

Ki Allah ouvert zot lé cœur et faire zot trouve la vérité et la nécessité de l'heure pour ki zot repentir et tourne vers Li, vers Li tousel ! *Ameen, Summa Ameen.*